



# KHUTBA JUMMAH

HAZRAT MUHYI-UD-DIN AL-KHALIFATULLAH

*Munir Ahmad Azim*

18 Décembre 2015 ~  
(06 Rabi'ul Awwal 1437 Hijri)

**(Résumé Khutba)**

**Après ki li fine salué tous so bane disciples (et tous bane musulmans) entier le monde avec la salutation de paix dans l'islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite fer troisième partie de so Khutba Jummah lors « Mauvais L'Effet Télévision »:**

## MAUVAIS L'EFFET TÉLÉVISION

Par la grâce d'Allah, Allah (swt) dans So sagesse et par So grâce immense donne moi encore le *Tawfeeq* pou contigne mo Khutba azordi lors « *mauvais l'effet télévision* ». Sa bane le temps ki ou pé perdi devant télévision là, ou pas pou ré-attrape sa, ou même, ou pas conner commié le temps rester encore pou vivre lors sa la terre là. Alors profite sa tiguitté lé temps ki rester là dans bane *Ibaadat, Istigfaar* ; dépense tous ou le temps pou bane travail dans le chemin d'Allah et dépense ou l'argent aussi pou la propagation de l'unicité d'Allah. Pas alle dépense ou l'argent lors bane zaffaire ki pas pou faire ou gagne récompense, et contentement de coté d'Allah.

L'islam fine enseigne nous ki même kitchose ki nous possédé, nous pas gagne droit servi li dans façon ki nous oulé. Parceki en vérité tous kitchose appartenir à Allah seul ; nous le corps, nous la force, nous lé temps, nous l'argent, nous connaissance, etc.

Quant à TV, li faire nous gaspille nous le temps et nous l'argent dans désobéissance Allah, et li même faire nous vine paresse. Chaque seconde ki ou pé dépense devant télévision, c'est ene gaspillage de ou l'existence ki ou pé faire et ou pou bizin rendre compte pou tous sa avec ou Créateur. Tellement ou télévision jouer prend dépi gramatin jusqu'à fort tard dans la nuit ou Bill électricité à la fin du mois vine énorme. C'est ene gaspillage de ou l'argent ki ou pé faire, apart bane abonnement film ki ou faire et payer tous le mois. Pense bien ena ene compte pou ou render pou sa bane l'argent ki Allah (swt) fine donne ou là et si ou ti prend sa même l'argent là, ou

ti mette sa dans fond du Jamaat, pou dépense pou la cause d'Allah, bé définitivement ou l'argent, ou la caze, tous ti pou ena *Barakat* et aussi ou pou gagne ene très grand récompense dans *Aakherat*, Insha Allah. Céki ou semer lors sa la terre là, sa même ou pou récolter dans *Aakherat*. Ou sème bane bon actions pou seulement la cause d'Allah, bé ou pou récolter bane récompense infini dans sa le monde là même et dans *Aakherat* pou pli meilleur et grand encore. Avec télévision, ou perdi ou le temps, ou l'argent, l'amour d'Allah, péna *Barakat* dans la caze, la santé pé gâter, lizié pé pli affaiblie et en résultat de sa tellement assize devant télévision ou vine ene gros paresse, pas juste paresse, ou manifester Shaytan aussi dans ou kot ou alle quitte Allah (swt) et So Rassool (saw) zot l'enseignement bien, bien loin et entre-temps bane l'ennemis pé travaille pou détruire la religion ki Allah (swt) fine parfaire.

Chaque musulman bizin conne sa très bien dans ki but unique ki Allah (swt) pé permette nous servi l'oxygène lors sa la terre là. C'est en vrai dire pour ki nous faire So *Ibaadat*. Aparte le *Salaat*, tout action ki nous faire pou le plaisir d'Allah, c'est bane actes d'*Ibaadat*. Donc pose ou même ene question : « Eski guette télévision (surtout sa bane film malpropre là, ki pé gâte nous la foi, nous la vie, la vie familiale, nous l'environnement etc.) forme partie dans *Ibaadat* ki Allah (swt) fine envoie nous lors la terre pour faire? »

Ki ou pou faire l'heure fine arriver pou quitte sa le monde temporaire là, kot ou ti seulement ene voyageur ici ? Eski l'heure là ki ou pou dire Allah (swt) « *O Allah donne moi ene ti délai encore afin ki mo vine parmi To bane bons serviteurs* » ? Allah en réponse pou dire ou : « *Péna aucaine délai pou ou, péna renouvellement Visa ici, fine donne ou, ou quantité jours et le temps pou ki ou vine parmi Mo bane bons serviteurs, mais ou fine alle perdi tous ou le temps précieux et bane jours important devant télévision avec so bane mauvais l'effet, bien tiguette de bon ki ou fine capave gagner avec télévision, en résultat de compte pli boucou mauvais ou fine gagner.* »

L'Islam fine enseigne nous aussi pou vivre en paix et kan dans nous même ena sa la paix la, tous dimounes autour de nous aussi pou en paix, et pas fine enseigne nous la brutalité envers nous proche et l'humanité en générale et ni bizin coquin personne so droit. L'Islam pas fine juste faire nous considère sak dimoune ki lire le *Kalima* comme nous frère, mais fine enseigne nous ki so la vie, so l'honneur et so richesse sacré pareille couma le Saint Coran li ene livre bien sacré pour nous (c'est bane parole d'Allah). Quant à TV, li faire ou et ou bane zenfants témoigne brutalité et violence tous les jours, et sa incite ou pou agir pareille, et comme résultat la paix enlevé et ou népli senti ou en sécurité. Guette ki kalité l'enseignement TV montrer ou et ou bane zenfant, couma bizin faire brute et couma bizin coquin dans ene façon professionnel etc.

L'Islam fine enseigne nous pou pas riyer boucou, parceki riyer boucou faire le cœur mort. Quant à TV, avec bane programmes comédies (et là-dans aussi ena saki indécent aussi), ou et ou bane zenfant rester riyer avec zot comédies et accompagner avec so indécence, ou admire zot et ou reste riyer kot ou pé touye ou le cœur, ou népli ressenti grandeur Allah dans ou lé cœur, ou oublier ki ou bizin présente devant Allah Jour Qiyamat. En plus de sa, ou népli prend compte punition ki Allah fine mentionné concernant l'enfer et récompense de bon action dans paradis.

Astaire pose ou même sa question là : combien ou le cœur fine vine dure ? Et combien Shaytan fine gagne l'autorité lors ou le cœur ?

L'Islam fine montré nous réalité de nous la vie. Nous lors sa la terre là, pou vivre dans *Ibaadat* Allah, nous bane serviteurs d'Allah et nous bizin faire juste So la loi prévaloir dans chaque l'aspé de nous la vie. La vie lors la terre li bien courte et li termine par ene kitchose inévitable ki appelle la mort, et ensuite après la mort nous ena pou deboute devant Allah dans So tribunal pou rendre compte de chaque action ou parole ki nous fine faire ou prononcer, et après ena seulement deux destination: L'enfer ou paradis. Quant à télévision, li pas juste faire nous oublier réalité de nous l'existence lors sa la terre là, mais li même donne nous ene fausse visage de la vie. Télévision faire ou croire ki nous même possède bane pouvoirs et l'autorité, ki ou capave faire céki ou envie et à travers télévision ou alle croire ki l'objectif de nous l'existence lors sa la terre là c'est ki nous travail dans grand place malgré péna compétence; si réussi arrive rentre par la fenêtré pas faire narien, gagne bon la paye, l'auto, bel la caze, la vie luxe, extravagant, l'amusement, gambling, travail tiguitte gagne boucou l'argent!

L'Islam enseigne nous pou vivre dans ene façon ki ena le dialogue entre nous et surtout entre bane membres de la famille, afin ki sakaine conseille so camarade. Sakaine ordonne le bien et empêche le mal, et afin ki l'amour et l'affection prévaloir entre nous.

Quant à télévision, li enlève sa dialogue là, et alors le conseil mutuel enlevé; l'amour et l'affection aussi enlevé. À travers télévision, sakaine concentrer dans so programme et personne pas trouve le temps pou cause avec so camarade. Parents pas gagne les temps pou questionne zot zenfants en céki concerne zot l'étude dans l'école ou *Madrassa*, ou bien en céki concerne zot fréquentation, zot l'heure rentre la caze etc. Bane zenfants aussi pas gagne le temps pou bénéficier de bane conseils et l'expérience la vie de zot parents.

A travers télévision, assizé en famille manger tous ensemble fine enlevé, et sa c'est ene l'autre façon couma l'amour et l'affection enlevé depuis ene la caze et personne pas comprend caractère ou problème de so camarade.

Donc en terminant, ene musulman supposer ene personne intelligent; li bizin conne faire différence entre céki pou apporte li du bien et céki pou faire li du tort. Ene musulman pas juste suivre tendance sans prend compte ki sa capave amène li jusqu'à so propre destruction dans sa le monde là et dans *Aakherat*. Eski pas fine arrive l'heure pou ki nous réveillé de nous grand sommeil et arrête prend la vie pou ene joujou ?

Mo faire *duah* ki sa bane réalités là rentre dans nous le cœur et pousse nous pou réagir afin ki nous protège nous l'avenir et l'avenir de nous zenfants par combattre sa gros Shaytan ki dans nous la caze là. Surtout bane parents bizin réfléchi: eski zot oulé vine ene moyen pou la guidance de zot zenfants ou bien pou zot l'égarément ? Nous demande Allah pou protège nous contre tous l'effet Shaytan. *Insha Allah. Ameen.*

## CRIME DE HAINE CONTRE L'ISLAM

Nous tous conné saki fine passé le 13 Novembre 2015 dans Paris après ki bane extrémistes fine tire coute balle lors bane dimounes kot fine fer 129 morts et plisse ki 350 blessé. Après sa fine ena bane les autres attentats, et mois dernier même dans l'Amérique, quelques heures après bane attaques dans Paris, bane dimounes fine tire coup de balle lors ene masjid Ahmadi dans Meriden, Connecticut, « *Baitul Aman* ». Par la grâce d'Allah, pas fine ena bane victimes. Mais sa bane kalités attaques là lors bane masjids, ki li masjids Ahmadiyya ou bane les autres masjids et centres islamiques, ki li dans l'Amérique ou dans les autres pays pé vine de plus en plus fréquent, surtout vu vengeance ki bane dimounes envie tiré contre l'Islam, parski pour zot, c'est l'Islam et so bane l'enseignements ki à blâmer.

Pli pire encore, astaire là dans l'Amérique ena bane n'importe ki pé propose zot comme candidats pou vine président de bane Etats-Unis, par exemple, Donald Trump, ene Républicain ki vu bane situations saki fine passé dans Paris, fine saisi sa bane l'occasion là pou fer so campagne politique contre l'Islam kot li fine même propose la population Américaine ki si li vine président, li pou fer veille tous bane Musulmans et pou empêche bane Musulmans rentre dans l'Amérique. So bane propos de haine contre l'Islam et bane Musulmans fine fer la honte de so propre partie kot so bane propre dimounes fine condamne li pou ene telle propos parski l'Amérique li pour la liberté de la religion, de bane dimounes et de la liberté d'expression. Mo warning li, et bane couma li, ki si li pas désisté de so bane propos et réalise so erreur, si li continié avec so bane propos de haine contre l'Islam et bane Musulmans, abé Allah pou attrape li d'ene façon sévère. C'est Allah ki pou deal avec li, parski le terrorisme na péna religion. Le terrorisme, c'est terrorisme. Li pas l'Islam, le Christianisme, Judaïsme, Bouddhisme, etc. Bane terroristes existé dans toutes zot formes et dans tous bane cultures et religions. Si bane dimounes pas pé suivre bane bons l'enseignements de l'Islam et de bane les autres religions, alors c'est pas sa religion là ki à blâmer. Surtout l'Islam avec so bane l'enseignement exemplaire, alors c'est seulement bane ki suivre bane démarches de Shaytane sans guidance Allah et de So Messenger Hazrat Muhammad (saws) et de So Khalifatullah de sa siècle là ki pou alle dans la perte, kot zot gâte l'image de l'enseignement de l'Islam dans lizié de sa le monde là. Mais Allah Li grand et So Justice c'est meilleur Justice ki ene serviteur d'Allah bizin rechercher contre bane attaques de bane camarades Shaytane ki rode passe zot couma bane défenseurs de l'Islam et de bane les zot religions tels ki Christianisme etc.

Ene exemple de sa, saki fine passé dimanche dernier, le 13 Décembre 2015, saki bane vandales fine fer dans même la nuit dans masjid Ahmadiyya « *Baitus Salaam* » dans Hawthorne dans le Sud de Californie. Bane vandalisme ki fine fer inclure bane grafitti kot zot fine marque « Jésus » lors gate masjid et aussi zot fine envoye ene grenade en plastique pou effraye bane musulmans, et ici c'est bane Ahmadis en particulier. Zot fine aussi fer ravage dans Centre Islamique de Hawthorne kot zot fine écrire avec la peinture : « *Jésus c'est li le Guide* » (Jesus is the Way).

Li bien triste saki fine passé, mais li aussi ene moment pour bane Ahmadi et aussi bane les autres musulmans pou réfléchi ki si nous pas uni, alors pou contigne arrive nous sa bane attaques de haine là. Li ene leçon en particulier pour bane Ahmadi aussi, parski rappelle bien, kan ti ena dangers ti pé menacer dans Maurice contre bane Ahmadis, alors Allah fine révèle à travers moi bane attributs d'Allah (en l'an 2000) pou ki nous lire pou écarte sa bane dangers là. Mais malheureusement, au lieu zot écoute Allah et réponde favorablement à l'appel d'Allah, zot fine bouffone sa, et fer complots pou mette moi et bane ki fine croire dans moi en dehors du Nizam-e-Jamaat. Malheureux à zot ! L'amour ki zot prêché dans le monde pou présente ene bon l'image de zot, pas fine mette en pratique envers zot bane propres dimoune même, bane Ahmadis couma zot ! Maintenant, bane Ahmadis pas zis pé souffert dans la mains de bane les autres musulmans, mais le monde « moderne », kot majorité Chrétiens et Juifs pé sorti contre zot, et même aussi bane les autres communauté religieuses (pé sorti contre l'Islam, et aussi bane Ahmadis).

L'Islam c'est la Paix ; pas ena aucaine doute là-dans. Alors ki faire nous bane musulmans, de toute l'Oummah en entier, nous pas en paix ? Nous bizin blâme nous-mêmes avant tout avant blâme les autres, parski bane les autres kan zot trouvé ki nous pas uni, alors zot capave fer saki zot envie avec nous. Népli ena sa l'union ki Hazrat Muhammad (saws) ti amené et ki ti fer l'Arabie à l'époque uni dans ene même but, ene même croyance, et aussi pou être tolérant aussi envers bane ki pas fine accepter l'Islam. Li (saws) et bane *Khulafa-e-Rashideen* fine respecter bane croyances de bane les autres et fine adopter : « **Laa Ikraha fid-Deen** » (Pas ena aucaine contrainte dans la Religion). C'est vrai ki fine ena bane conquête de bane la terre, pareil couma à sa l'époque là, bane les autres aussi, couma bane Romains, Persans etc. ti pé fer bane conquêtes de la terre, mais bane Musulmans, bane *Pakka* (Sahih) Musulmans à aucaine moment fine force l'Islam lors bane dimoune, et c'est sa ki montrer la beauté de l'Islam.

Mo fer duah ki bane musulmans, irrespective de bane Jamaats réaliser ki faveur Allah fine fer zot ki dans sa siècle là, pareille couma Li fine promesse, Li fine envoye So Khalifatullah pou unir zot tous et pou passe sa message là afin ki zot tous profite de sa pour zot propre bienfaits matériel et spirituel. L'Honneur de l'Islam dans balance et c'est à nous bane musulmans comme ene sel lécorps nous bizin deboute comme ene sel la voix pou protège la pureté de bane l'enseignements de l'Islam et du Sceau des prophètes, Hazrat Muhammad (saws). *Insha-Allah, Ameen.*